



SKUPŠTINA BRČKO DISTRIKTA BiH

# Bilten

ZA 2024. GODINU

Informativni Bilten Skupštine Brčko distrikta BiH - godina 2024 - januar, februar, mart, april - broj 7









# SADRŽAJ

UVOD .....	5
IZMJENAMA I DOPUNAMA KRIVIČNI ZAKON DISTRIKTA BIT ĆE USKLAĐEN S KONVENCIJAMA VIJEĆA EVROPE .....	6
USVOJENE IZMJENE NEKOLIKO ZAKONA O PLATAMA .....	7
USVOJEN PLAN RADA SKUPŠTINE ZA 2024. GODINU .....	8
USVOJENA ODLUKA O RASPOLAGANJU JAVNOM IMOVINOM PUTEV SPECIJALNE POGODBE S „BOSNAPLODOM“, „LINIJOM VOĆA“ I „BIMALOM“ .....	9
ODOBRENO SEDAM REGULACIONIH PLANOVA I URBANISTIČKI PROJEKAT „CIGLANE“ .....	10
KANCELARIJA ZA PREVENCIJU KORUPCIJE U PRVOJ POLOVINI 2023. GODINE ZAPRIMILA 32 PRIJAVE KORUPTIVNIH RADNJI .....	11
ODOBRENO KREDITNO ZADUŽENJE DISTRIKTA KOD SVJETSKE BANKE U SVRHU REALIZACIJE PET VELIKIH PROJEKATA .....	12
BESPLATNO PARKIRANJE NA BOLNIČKOM PARKINGU U TRAJANJU OD DVA SATA ....	13
PREDSJEDNIK I POTPREDSJEDNIK SKUPŠTINE ODRŽALI SASTANAK S ČLANOVIMA ASOCIJACIJE VOJNO-DIPLOMATSKIH PREDSTAVNIKA U BIH .....	14
NASTAVLJENI RADOVI NA UREĐENJU KORITA POTOKA BLIZNA U DONJEM BREZIKU ..	15
POTPREDSJEDNIK SKUPŠTINE OBIŠAO RADOVE NA ISTRAŽNOJ BUŠOTINI VODE U NASELJU GORNJA SKAKAVA .....	16
PREDSJEDNIK SKUPŠTINE POSJETIO 6. SAJAM ZAPOŠLJAVANJA I OBRAZOVANJA ....	17
POTPISAN MEMORANDUM O SARADNJI IZMEĐU SKUPŠTINE I VERMONTA .....	18
PRIJEM ZA ČLANOVE ATLETSKOG KLUBA „MARATON“ BRČKO .....	19
ODRŽANA SVEČANA AKADEMIJA POVODOM DANA DISTRIKTA .....	20
SLUŽBENICE ZLATA IBRAHIMOVIĆ I GOSPA JEVTIĆ OVE GODINE ODLAZE U PENZIJU ..	21
Mirsada Dervišević KAHVA SE SLUŽI UZ OSMIJEH .....	23

## IMPRESUM

### **Stručna služba Skupštine Brčko distrikta BiH**

Uređivački tim Biltena:

#### **Urednica:**

Maja Kovačević-Gudelj, stručni savjetnik za odnose s javnošću

#### **Tehnička obrada i grafički dizajn:**

Mato Radić, tehničar za rukovanje audio i video tehnikom

#### **Prilagodio za web:**

Stefan Marjanović, administrator IT sistema

#### **Lektori:**

Andrea Antić-Dugeč

Marica Lakić

Fatima Ribić

#### **Fotografije i tekst**

Arhiva Stručne službe Skupštine



# UVOD



U ovom broju Biltena sumirani su rezultati rada Skupštine Brčko distrikta BiH u prva četiri mjeseca 2024. godine. U tom periodu Skupština je održala četiri redovne sjednice u nastavcima. Usvojene su Izmjene i dopune Krivičnog zakona kao i izmjene nekoliko zakona o platama i dato je odobrenje da se Distrikt kreditno zaduži kod Svjetske banke kako bi se moglo realizovati pet značajnih kapitalnih projekata.

Kako ove godine moje dvije kolegice odlaze u penziju odlučila sam da jedan dio Biltena posvetim baš njima. Kroz kratak razgovor podijelile su sa nama svoja osjećanja pred odlazak u penziju, ali i radna iskustva u komunikaciji s ljudima.

Na stranicama koje su pred Vama možete detaljnije pročitati o ovim i drugim temama i aktivnostima Skupštine koje su obilježile njen rad u prvom četveromjesečnom periodu 2024. godine.

S poštovanjem,

Urednik Biltena  
Maja Kovačević Gudelj



# IZMJENAMA I DOPUNAMA KRIVIČNI

## ZAKON DISTRIKTA USKLAĐEN S

## KONVENCIJAMA VIJEĆA EVROPE

Skupština Brčko distrikta BiH usvojila je Izmjene i dopune Krivičnog zakona Brčko distrikta kojim je ovaj zakon usklađen s konvencijama Vijeća Evrope, odnosno Istanbulskom konvencijom o prevenciji i borbi nasilja nad ženama i nasilja u porodici i Lanzarote konvencijom o zaštiti djece od seksualnog zlostavljanja i seksualnog iskorištavanja, a koje je BiH potpisala 2013. godine.

Predsjednik Skupštine Siniša Milić napomenuo je da je Republika Srpska već implementirala rješenja iz Istanbulske konvencije kroz svoje zakonodavstvo dok je Federacija BiH na putu da to učini. Vršilac dužnosti sekretara Pravo-sudne komisije Brčko distrikta BiH Rade Mitrović rekao je da je ovim izmjenama i dopunama predviđena uspostava posebnog registra lica koja su pravosnažno osuđena

za krivična djela protiv spolnog integriteta braka i porodice u kojima su žrtve djece.

„Izmjenama i dopunama postojećih odredbi mijenja se i definicija pojma djeteta i u smislu ovog zakona djetetom će se smatrati lice koje nije navršilo osamnaest (18) godina“, rekao je Mitrović na redovnoj sjednici Skupštine tokom izlaganja Nacrta izmjena i dopuna Krivičnog zakona Brčko distrikta.





# USVOJENE IZMJENE NEKOLIKO ZAKONA O PLATAMA



Skupština Brčko distrikta BiH je u drugom nastavku 57. redovne sjednice, po hitnom postupku, usvojila izmjene zakona o platama i naknada zaposlenih u Policiji, Pravosuđu, korisnika budžetskih sredstava u Skupštini, Izornoj komisiji i Kancelariji za reviziju javne uprave i institucija Distrikta, zaposlenih u organima javne uprave i institucijama Brčko distrikta i izmjene Zakona o papirima od vrijednosti.

Predsjednik Skupštine Siniša Milić rekao je da je potreba za izmjenama ovih pet zakona nastala usljed povećanja najniže plate u Republici Srpskoj na 900 KM.

*„Naš zakon je previđao da viša najniža plata u entitetima bude osnovica za obračun plata u Brčko distriktu. Ukoliko bi se ta osnovica i primijenila bila bi ugrožena fiskalna stabilnost. Iz tog razloga je izmijenjen taj član zakona u svih ovih pet zakona na način da je os-*

*novica utvrđena u iznosu od 65 do 70 posto od prosječne neto plate u Distriktu“*, rekao je Milić.

On je istakao da će se nova osnovica za obračun plata koja iznosi 767, 22 KM primjenjivati od 1. jula do 31. decembra tekuće godine.

Milić je naveo da je ovim izmjenama izvršeno i prilagođavanje koeficijenata novoj osnovici i da je predviđen linearan rast plata svim zaposlenima u iznosu od 165 KM.



# USVOJEN PLAN RADA SKUPŠTINE ZA 2024. GODINU



Šefica Stručne službe Skupštine Stojanka Knežević je prilikom obrazlaganja Plana rada Skupštine za 2024. godinu, koji je dobio podršku poslanika, rekla da je ovo prvi put da se Plan rada Skupštine za jednu godinu nađe pred poslanicima te da se i ove godine očekuje približno isti broj sjednica kao i prošle, odnosno 24. Ona je napomenula da je Skupština, u 2023. godini, usvojila 25 zakona,

251 odluku, 26 zaključaka, razmatrala 41 informaciju te da su skupštinske komisije održale 194 sjednice. „Izašao je 41 broj Službenog glasnika Brčko distrikta u kojem je objavljeno 1245 akata, 154 sudske odluke i ukupno je obrađeno 1149 zahtjeva za oglašavanje raznih dokumenata da su nevažeći“, istakla je Knežević. Ona je navela da se Plan rada Skupštine Brčko distrikta kao budžetskog korisnika sastoji od tri programa, da

prvi program čine politički sistemi i upravljanje za koje je nadležna Skupština, da se drugi odnosi na stručne i operative programe za koje je nadležna Stručna služba Skupštine dok se treći program odnosi na organizaciju i sprovođenje izbora za šta je nadležna Izborna komisija Distrikta.

„Realizacija Plana rada Skupštine zavisi od realizacije plana Vlade“, istakla je Knežević.





# USVOJENA ODLUKA O RASPO- LAGANJU JAVNIM PUTEM SPECIJALNE POGODBE S „BOSNAPLODOM“, „LINIJOM VOĆA“ I „BIMALOM“

Skupština je u prvom nastavku 55. redovne sjednice usvojila odluke o raspolaganju javnom imovinom putem specijalne pogodbe s tri brčanska preduzeća „Bosnaplod“, „Linija voća“ i „Bimal“.

Direktorica Kancelarije za upra-

vljanje javnom imovinom Brčko distrikta Dijana Pajić rekla je da je putem ovih pogodbi „Bosnaplodu“ dato u zakup 76,3 hektara poljoprivrednog zemljišta po ukupnoj cijeni od 5601 KM na godišnjem nivou, „Liniji voća“ 66,17 hektara poljoprivrednog



zemljišta po ukupnoj cijeni od 4766 KM godišnje, dok će „Bimalu“ putem specijalne pogodbe biti prodana parcela s oznakom 4007/9 KU Brčko jedan, ukupne površine 5667 metara kvadratnih, po cijeni od 345 637,33 KM.



# ODOBRENO SEDAM REGULACIONIH PLANOVA I URBANISTIČKI PROJEKAT „CIGLANE“

Skupština Brčko distrikta BiH je u drugom nastavku 55. redovne sjednice odobrila regulacione planove „Centar jedan“, „Klanac“, „Kolobara dva“, „Ficibajer“, Izmjenu dijela Regulacionog plana stambenog naselja „Mujkići dva“, Izmjenu i dopunu Regulacionog plana stambenog naselja „Š“, Izmjenu Regulacionog plana dijela stambenog naselja „Rijeke dva“ i Urbanistički projekat „Ciglane“.

Predsjednik Skupštine Brčko distrikta Siniša Milić rekao je da su regulacioni planovi usvojeni uz zaključak kojim se Odjeljenju za prostorno planiranje i imovinsko-pravne poslove naložilo da predloži izmjene i dopune usvojenih regulacionih planova u dijelovima koji se odnose na saobraćajnu infrastrukturu i katastarske parcele kod kojih će doći do promjene namjene i usklađivanja s projektima javno-privatnog partnerstva koje je usvojila Skupština Brčko distrikta.

Predsjednik Milić je rekao da je zaključak donesen nakon što je na sjednici izneseno niz primjedbi da je izrada tih regulacionih planova pokrenuta prije mnogo godina i da su prevaziđeni na pojedinim mikrolokacijama.





# KANCELARIJA ZA PREVENCIJU KORUPCIJE U PRVOJ POLOVINI 2023. GODINE ZAPRIMILA 32 PRIJAVE KORUPTIVNIH RADNJI

Skupština Brčko distrikta BiH primila je k znanju Izvještaj o radu Kancelarije za prevenciju korupcije i koordinaciju aktivnosti na suzbijanju korupcije u Distriktu za 2022. godinu i za prvu polovinu 2023. godine. Zamjenik direktora ove kancelari-

je Mirza Mešanović rekao je da je Kancelarija u prvoj polovini 2023. godine zaprimila 32 prijave koruptivnih radnji, od kojih je sedamnaest kompletirano i proslijeđeno Policiji i Tužilaštvu, dok je šest bilo neosnovano.

„Većina prijavljenih slučajeva se

odnosi na ugrožavanje radno-pravnog statusa zaposlenog od strane nadležnih u instituciji u kojoj je korupcija prijavljena. Kancelarija zakonski stoji iza prijavitelja korupcije, odnosno zviždača u smislu zaštite radno-pravnog odnosa“, rekao je Mešanović.





# ODOBRENO KREDITNO ZADUŽENJE DISTRIKTA KOD SVJETSKE BANKE ZA REALIZACIJU PET VELIKIH PROJEKATA

Skupština Brčko distrikta BiH je održala prvi nastavak 56. redovne sjednice na kojem je usvojila Odluku o zaduženju Brčko distrikta kod Svjetske banke za potrebe finansiranja Programa integrisanog razvoja koridora Save i Drine primjenom višefaznog programskog pristupa.

Predsjednik Skupštine Brčko distrikta BiH Siniša Milić rekao je da je riječ o kreditnom zaduženju Distrikta u iznosu od 25 miliona eura za potrebe realizacije pet projekata: zatvaranje postojeće gradske deponije, izgradnju savremenog centra za upravljanje čvrstim otpadom, regulaciju gornjeg toka potoka Blizna i rijeke Brke i izgradnju šetališne i biciklističke staze desnom obalom rijeke Save od naselja Vučilovac do naselja Brezovo Polje.

Predsjednik Milić je rekao da se na ovaj način rješava najveći komunalni problem u Distriktu, odnosno problem gradske deponije.

„Za sanaciju deponije, koja je ekološka bomba, bit će obezbijeđeno sedam miliona eura kreditnih sredstava, dok će za gradnju centra za upravljanje otpadom, koji će biti potpuno bezbjedan za životnu sredinu, ovim kreditom, biti obezbijeđeno 7,5 miliona eura“, rekao je predsjednik Milić. Glavni koordinator Vlade Brčko distrikta BiH Željko Antić rekao je da je ovo kreditno zaduženje veoma povoljno i da je s periodom otplate 35 godina s grejs periodom od sedam godina.

„Ovo su vrlo povoljna sredstva jer će ih Distrikt dobiti po stopi Euribora koji sada iznosi 3,8 posto“, istakao je Antić.

Skupština je dala saglasnost na Plan poslovanja JP „Komunalno Brčko“ za 2024. godinu. Direktor JP „Komunalno Brčko“ Kemal Atić rekao je da preduzeće radi na preuzimanju pet mjesnih vodovoda i da inženjeri hidrogeološke struke treba da utvrde stanje sekundarne vodovodne mreže kako bi dali procjenu o iznosu novca koji je potreban za rekonstrukciju tih vodovoda.

On je naveo da će novac za ove namjene tražiti od Vlade Distrikta. Govoreći o mobilnoj spalionici animalnog otpada Atić je rekao da je nabavljena prije nekoliko godina ali da još nije u upotrebi zbog nedostatka lokacijskih dozvola.





# BESPLATNO PARKIRANJE NA BOLNIČKOM PARKINGU U TRAJANJU OD DVA SATA



Skupština Brčko distrikta BiH dala je saglasnost na Odluku o izmjeni i dopuni Cjenovnika parkiranja Javnog preduzeća „Putevi Brčko“ kojim je pacijentima Bolnice omogućeno besplatno parkiranje na bolničkom parkingu u trajanju od dva sata.

Saglasnost na ovaj cjenovnik data je uz zaključak kojim se obavezuje Javno preduzeće „Putevi Brčko“

da u roku od 60 dana dostavi Skupštini novi cjenovnik usluga i način naplate s prijedlozima o pogodnostima za određene kategorije građana Distrikta.

Predsjednik Skupštine Siniša Milić rekao je da su se na sjednici čuli različiti prijedlozi da određene kategorije građana budu oslobođene od plaćanja parking mjesta te da se nada da će Skupština u

previđenom roku dobiti od „Puteva“ kvalitetan prijedlog novog cjenovnika.

Direktor Javnog preduzeća „Putevi Brčko“ Vlado Jeftić rekao je da će novi cjenovnik parkiranja ovo preduzeće raditi u saradnji s Vladom i Skupštinom kako bi se građanima Distrikta obezbijedio efikasan parking sistem s prihvatljivim cijenama parkiranja.



# PREDSJEDNIK I POTPREDJEDNIK SKUPŠTINE ODRŽALI SASTANAK S ČLANOVIMA ASOCIJACIJE VOJNO-DIPLOMATSKIH PREDSTAVNIKA U BiH



**P**redsjednik i potpredsjednik Skupštine Brčko distrikta BiH Siniša Milić i Ivo Filipović su održali radni sastanak s članovima Asocijacije vojno-diplomatskih predstavnika akreditovanih u BiH koji su

izrazili zadovoljstvo stabilnom situacijom u Distriktu.

Sastanku s predsjednikom i potpredsjednikom Skupštine prethodili su sastanci s gradonačelnikom Brčkog Zijadom Nišićem i šefom Policije Brčko distrikta

BiH Goranom Pisićem.

Posjeta predstavnika Asocijacije Distriktu dio je Plana saradnje za 2024. godinu koji je potpisan između Ministarstva odbrane BiH, Oružanih snaga BiH i Asocijacije.



# NASTAVLJENI RADOVI NA UREĐENJU KORITA POTOKA BLIZNA U DONJEM BREZIKU



**P**redsjednik Skupštine Brčko distrikta BiH Siniša Milić i šef Odjeljenja za poljoprivredu, šumarstvo i vodoprivredu u Vladi Brčko distrikta BiH Milenko Ninković obišli su radove u donjem dijelu toka potoka Blizna u naselju Donji Brezik.

Predsjednik Skupštine Siniša Milić rekao je da je vrijednost projekta regulacije korita potoka Blizna u gornjem i donjem toku, oko 2,5 miliona maraka, te da je dio sredstava obezbijeđen iz budžeta Distrikta, a dio iz kredita kod Svjetske banke.

Milić je istakao da nakon završetka radova u donjem dijelu toka potoka Blizna slijede radovi na regulaciji gornjeg toka u dužini od 400 metara.

*„Sigurno je da će nakon završetka ovog projekta doći do poboljšanja kvaliteta života ljudi na ovom prostoru. Kada zažive svi oni sadržaji koji su predviđeni dodatnim projektima kao što je izgradnja šetališta i biciklističke staze onda ćemo ovdje, sasvim sigurno, imati mjesto koje će služiti kao izletišta i okupljanje naših sugrađana“,* istakao je predsjednik Milić.

On je napomenuo da će uskoro početi radovi na zatvaranju i sanaciji deponije smeća koja se nalazi u neposrednoj blizini potoka Blizna, da je to projekat koji će se finansirati kreditnim sredstvima Svjetske banke za koji je dobijena građevinska dozvola.

Šef Odjeljenja za poljoprivredu,

šumarstvo i vodoprivredu u Vladi Brčko distrikta BiH Milenko Ninković podsjetio je da je u prošlom mandatu predsjednika Skupštine kao gradonačelnika započeta realizacija ovog projekta kada je uređeno 103 metra korita Blizne uzvodno od mosta i 266 metara korita nizvodno od mosta prema ušću u rijeku Savu.

Ninković je rekao da se trenutno radi na uređenu još 113 metara korita Blizne i da je raspisan tender za izbor izvođača radova za uređenje dodatnih 80 metara.

„Predložiti ćemo Vladi i Skupštini da se rebalansom obezbijede sredstva za uređene preostalih 80 metara korita nizvodno od mosta“, rekao je Ninković.



# POTPREDSJEDNIK SKUPŠTINE OBIŠAO RADOVE NA ISTRAŽNOJ BUŠOTINI VODE U NASELJU GORNJA SKAKAVA



Potpredsjednik Skupštine Brčko distrikta BiH Ivo Filipović je zajedno sa zamjenikom gradonačelnika Brčko distrikta Antom Domićem, šefom Odjeljenja za evropske inte-

gracije i međunarodnu saradnju Miroslavom Geljićem i savjetnicom gradonačelnika Lucijom Hrgovčić obišli su završne radove na istražnoj bušotini vode

u naselju Gornja Skakava. Nakon obimnih istraživanja, u tom naselju pronađen je izvor koji bi u budućnosti mogao napajati vodom ovo područje.





# PREDSJEDNIK SKUPŠTINE POSJETIO 6. SAJAM ZAPOŠLJAVANJA I OBRAZOVANJA

**P**redsjednik Skupštine Brčko distrikta BiH Siniša Milić je zajedno s gradonačelnikom Brčko distrikta BiH Zijadom Nišićem posjetio šesti Sajam zapošljavanja i obrazovanja gdje su obišli svih 60 štandova i razgovarali s izlagačima koji su došli iz Distrikta i ostatka BiH.

Predsjednik Milić koji se obratio prisutnima na ceremoniji otvaranja Sajma, rekao je da je ovo dobra

prilika za djecu školskog uzrasta da se upoznaju s ponudom obrazovnih ustanova ali i prilika da se sagleda stanje na tržištu rada i potrebama privrede.

„Vlada Brčko distrikta i zakonodavna vlast treba da kreiraju propise i stvore takav ambijent da naši ljudi ne odlaze odavde. To podrazumijeva i adekvatno plaćanje radnika s jedne strane, dok s druge strane ne treba da opterećujemo privre-

du svemu onome što može usporiti njen rast i razvoj“, rekao je predsjednik Milić.

Milić je poručio da se dijalog sa socijalnim partnerima mora nastaviti kako bi tržište rada bilo povoljnije. Sajam zapošljavanja organizovao je Zavod za zapošljavanje Brčko distrikta u saradnji s Omladinskim centrom Vermont Brčko i pod pokroviteljstvom Vlade Brčko distrikta BiH.



# POTPISAN MEMORANDUM O SARADNJI IZMEĐU SKUPŠTINE I VERMONTA

**P**redsjednik Skupštine Brčko distrikta BiH Siniša Milić i direktor Omladinskog centra „Vermont“ Brčko Damir Radenković potpisali su Memorandum o saradnji između Skupštine i „Vermonta“ u cilju podrške Vermontovom projektu „Omladinski parlament“.

Predsjednik Skupštine Siniša Milić rekao je da će na ovaj način Skupština Distrikta dobiti odgovarajuće inpute kada je u pitanju omladinska politika i da je ovo način da se mladi animiraju i pripreme za politički angažman.

„Postoje različite predrasude o politici koje stoje ili ne stoje, ali

ovo je izvrstan način da se politika vrati građanima, biračima, mladima da i oni učestvuju u kreiranju tema koje su od interesa za cjelokupnu zajednicu. Na ovaj način ćemo održavati tu vezu i mijenjati politiku na bolje da ona istinski bude u funkciji građana“, rekao je predsjednik Milić.

Direktor Omladinskog centra Vermont Brčko Damir Radenković istakao je da je cilj projekta Omladinski parlament, koji je Vermont pokrenuo prije tri mjeseca u saradnji s Vladom SAD-a, da se mladi uključuje u proces donošenja odluka. Radenković je istakao da će u okviru tog projekta, do oktobra 2024.

godine, po uzoru na prave, biti održani omladinski izbori na kojima će biti izabran 31 član omladinskog parlamenta koji će potom održati četiri sjednice.

„Zaključke sa tih sjednica o projektnim idejama iz oblasti obrazovanja mladi će predstaviti poslanicima u Skupštini Distrikta. Članovi omladinskog parlamenta na dan lokalnih izbora u BiH bit će posmatrači na izbornim mjestima u Distriktu. Želja nam je da ove mlade ljude uključimo u sve procese, ne samo izborne, nego i u mjesne zajednice, sportske kolektive i nevladine organizacije“, poručio je Radenković.







## PRIJEM ZA ČLANOVE ATLETSKOG KLUBA „MARATON“ BRČKO

**P**redsjedavajući Komisije za budžet Skupštine Brčko distrikta BiH Srđan Blažić primio je danas u maloj sali Skupštine članove Atletskog kluba „Maraton“ iz Brčkog s kojima je razgovarao o uspjesima Kluba na domaćim i međunarodnim takmičenjima te mogućnostima pomoći u radu Kluba.

Blažić je ovom prilikom istakao da je u toku izrada novog pravilnika o donacijama u sportu za redovna sredstva po kojem će sportski kolektivi dobijati novčana sredstva na osnovu postignutih rezultata te da bi pravilnik trebao biti usvojen u narednih mjesec dana.

Blažić je rekao da Brčko distrikt ima mnogo potencijala da finansira sportske kolektive i pojedince i da njihovi rezultati moraju biti prepoznati.

„U protekle tri godine bilo je mnogo problema u finansiranju i sufinansiranju sportskih kolektiva i pojedinaca na području Distrikta nakon donošenja novih zakonskih rješenja, najviše zbog nesnalaženja nadležnih odjeljenja u ovom pravcu finansiranja sportskih kolektiva. Čini mi se da smo sada na dobrom putu da konačno riješimo taj problem kroz novi pravilnik o donacijama“, rekao je Blažić.

Blažić je čestitao članovima AK „Maraton“ na postignutim rezultatima te istakao da su ovi atletičari kao i svi uspješni sportisti najbolji ambasadori jednog društva i da zaslužuju podršku grada.

U ime predsjednika Skupštine, Blažić je primio zahvalnicu Kluba. Predsjednik Atletskog kluba

„Maraton“ Brčko Srđan Samardžić, koji je i trener i atletičar u Klubu, zahvalio se predsjedavajućem Blažiću na prijemu i podršci koju im pruža.

On je istakao da su zahvaljujući novčanim sredstvima koja su im dodijeljena prošle godine iz budžeta mogli da se dobro pripreme za sva takmičenja što je i dalo rezultate - pet državnih prvaka i reprezentativaca u različitim disciplinama.

Atletski savez Republike Srpske proglasio je AK „Maraton“ Brčko za drugi najbolji klub u Srpskoj u 2023. godini, dok je Srđana Samardžića proglasio za najboljeg trenera Saveza.

AK „Maraton“ Brčko je ekipni prvak u krosu. Osnovan je 2017. godine i ima 30 članova.



# ODRŽANA SVEČANA AKADEMIJA POVODOM DANA DISTRIKTA

Povodom 24 godine od formiranja Brčko distrikta 8. marta je u Domu kulture održana svečana akademija kojoj su prisustvovali predstavnici izvršne i zakonodavne vlasti distrikta, udruženja građana i susjednih opština kao i supervizor za Brčko Džonatan Menući, šef Delegacije Evropske unije u BiH Johan Satler, Ministar unutrašnjih poslova Republike Srpske Siniša Karan, pomoćnik ministra rada i boračko-invalidske zaštite Republike Srpske Nebojša Vidaković, ministar komunikacija i saobraćaja BiH Edin Forto.

Predsjednik Skupštine Siniša Milić, koji se obratio prisutnima na svečanoj akademiji, rekao je da, i pored svih izazova koje je Distrikt imao, se može zaključiti da je ova lokalna zajednica ostvarila određeni napredak.

Predsjednik Milić je naveo da Distrikt, 24 godine poslije, ima stabilne institucije, stabilnu bezbjednu situaciju te da se kreće ka onom trenutku kada bi Vijeće za implementaciju mira moglo da proglasi distrikt Brčko kao zajednicu koja može da trajno, samostalno funkcioniše i da u potpunosti prestaju razlozi za angažman međunarodne supervizije.





# SLUŽBENICE ZLATA IBRAHIMOVIĆ I GOSPA JEVTIĆ OVE GODINE DLAZE U PENZIJU



*Zlata Ibrahimović, Stručni referent za obrađivanje zahtjeva za objavu u službenim glasnicima nevažećih dokumenata i sudskih oglasa*

Ove godine u penziju ispraćamo dvije naše službenice Zlatu Ibrahimović i Gospu Jevtić. Dok polako odbrojavaju radne dane, na poslu ostaju posvećene radnim obavezama, bez izuzetka.

Zlata Ibrahimović u penziju će otići s pozicije stručnog referenta za obrađivanje zahtjeva za objavu u službenim glasnicima nevažećih dokumenata i sudskih oglasa. I dok razgovaramo o njenom poslu, naviru joj sjećanja. Rad sa lju-

dima za nju je zanimljiv, ali kaže nije lak, zahtijeva ljubaznost u svim situacijama. A bilo je, nastavlja svoju priču Zlata, neobičnih i nesvakidašnjih situacija. Jedne se posebno sjeća.

„Muškarac srednjih godina došao je ispred pulta i ljutitim, odlučnim glasom rekao da želi da se odrekne svog sina. Zašto, nije rekao, ali je, kaže Zlata, bio uporan u tome.“ No, ona mu nije mogla pomoći jer to nije u opisu njenog posla, a ni u nadležnosti Skupštine. Šta je poslije bilo ne znam, kaže Zlata, i nisam uspjela saznati, ali to nikada neću zaboraviti.

Na pitanje kako se osjeća pred odlazak u penziju odgovara da su joj osjećaji pomiješani, ali da se ipak raduje odlasku, jer je, priznaje, već isplanirala kako će provoditi penzionerske dane.







*Gospa Jeftić, Službenica na telefonskoj centrali  
Skupštine Brčko distrikta BiH*

**P**rvi s kojim razgovaraju građani kada pozovu telefonsku centralu Skupštine je Gospa Jeftić. Ove godine navršava 65 godina života čime je stekla uslove za odlazak u starosnu penziju. I ona, kao i Zlata, službenik je čiji opis poslova zahtijeva rad sa strankama. „Raditi s ljudima nije lako, ali je zanimljivo. Nerijetko traže da razgovaraju telefonom s predsjednikom ili potpredsjednikom Skupštine, što često nije moguće jer oni imaju

svoje obaveze. Teško je to ljudima objasniti. A ima i onih koji pogriješe instituciju“, priča Gospa.

Ne krije da jedva čeka da završi svoj radni vijek. Sve što želi je da penzionerske dane provode u miru, sa svojim unucima kojima se uvijek raduje.

„Oni mi uljepšaju dan. Svojim nestašlucima me znaju i naljutiti, ali brzo to prođe, te se mi opet igramo i smijemo. Puni su energije koju prenose i na mene. Uz njih se

osjećam mlado. A ja se trudim da im udovoljim posebno kada je u pitanju spremanje njihovih omiljenih jela i kolača. Sad znate zašto se radujem penziji. Jedino tada ću sve vrijeme ovog svijeta moći da posvetim mojim unucima, ali i djeci“, kaže Gospa.

Stručna služba Skupštine na čelu s predsjednikom i potpredsjednikom Skupštine Zlati i Gospi želi sretan odlazak u penziju.







# MIRSADA DERVIŠEVIĆ

## *Kahva se služi uz osmijeh*

**P**red penzijom je i naša Mirsada Dervišević, kahve-kuvarica koja će to pravo moći da ostvari za pet godina. Iako vremena još ima, Mima, kako je odmila zovemo svi u Službi, već smišlja planove kako će provoditi penzionerske dane. Kaže bit će to dani odmora i igre sa njenim unukom Adijanom.

Mima će sigurno ostati zapamćena po pozitivnom stavu, ali i anegdotama koje je ne zaobilaze. Jedne se i danas sjeća, priznaje pomalo sa stidom, kada je neho-

tice uz kahvu poslužila i luk bivšem potpredsjedniku Skupštine Mihailu Jovanoviću.

„Njemu je to bilo komično, a ja sam u zemlju propadala od stida. Od tada sam obazriva i dobro gledam šta nosim, jer to se ipak nije smjelo desiti, ali eto desilo se, ljudi smo.

Sad se pitate kako je luk dospio tu. Pa bit ću iskrena, jedan od kolega je spremao salatu u kuhinji u isto vrijeme kada sam i ja spremala kahvu i kako sam u žurbi htjela da uzmem šećer, ne gledajući, uzela

sam parče luka sa radne površine. Ostatak priče već znate“, kroz smijeh priča Mima, dok joj obrazi dobijaju ružičastu boju.

Svoj posao, priznaje, mnogo voli, jer je dinamičan i jer radi sa ljudima, već 23 godine. Kaže da bi opet to izabrala.

„Bilo je možda malo naporno na početku, dok se nisam „uhodala“. Sve do prošle godine radila sam sama, a sada imam i koleginicu, pa je mnogo lakše, jer smo podijelile posao“, kaže Mima i poručuje da se kahva uvijek služi uz osmijeh.



## SKUPŠTINA BRČKO DISTRIKTA BiH



Adresa: Mladena Maglova broj 2, Brčko



Telefoni: 049/215-516 (centrala)



E-mail: [info@skupstinabd.ba](mailto:info@skupstinabd.ba)



[www.skupstinabd.ba](http://www.skupstinabd.ba)



[facebook.com/skupstinabrckodistriktabih](https://facebook.com/skupstinabrckodistriktabih)



[youtube.com/@skupstinabrckodistrikta/videos](https://youtube.com/@skupstinabrckodistrikta/videos)